

四庫全書

史部

欽定四庫全書

欽定續通志卷四百三十四

列傳

金十二

伊喇履

張萬公

程輝

劉瑋

董師中

王脩

馬惠迪

馬琪

尼瑪哈鑑

黃久約

李晏

仲略

李愈

王賁

許安仁

溫特赫提克德

伊喇履字履道遼東丹王托雲七世孫也父約囉早亡其族兄興平軍節度使德元無子以履為後方五歲臥廡下見微雲往來天際忽謂乳母曰此所謂臥看青天行白雲者耶德元聞之驚曰是子當以文學名世及長博學多藝善屬文初舉進士惡搜檢煩瑣去之蔭補為承奉班祇候國史院書寫世宗興儒術詔譯經史擢經史院編修官一日世宗召問曰朕讀貞觀政要見魏徵

嘉謀忠節良可稱歎近世何故無如徵者履曰忠嘉之士何代無之但上之人用與不用耳世宗曰劉仲晦張汝震屢有忠言朕超用之安得謂之不用履曰臣未聞其諫也海陵杜塞言路天下緘口願陛下懲艾前事開諫諍之門天下幸甚初議以時務策設女真進士科禮部以所學不同未可槩稱進士詔履定其事乃上議曰進士之科起於隋大業中始試以策唐初因之高宗時雜以箴銘賦詩至文宗始專用賦進士之初本專試策

今女真諸生以試策稱進士又何疑焉世宗大悅事遂

施行

按元好問中州集載世宗問宋名臣孰優履以蘇軾對因論軾經濟良材求之古人陸贄而下未見

其比明日錄軾奏議上之詔國子監刊行本傳不載謹識於此

大定十五年授應奉翰

林文字兼前職俄遷修撰二十年詔提控銜慶宮畫功

臣像過期降應奉踰年復為修撰轉尚書禮部員外郎

章宗為金源郡王喜讀春秋左氏傳聞履博洽名質所

疑履曰左氏多權詐駁而不純尚書孟子皆聖賢純全

之道願留意焉王嘉納之二十六年進本部郎中兼同

修國史翰林修撰表進宋司馬光古文孝經指解曰臣竊觀近世皆以兵刑財賦為急而先獨以此進誠取其辭施諸宇內則元元受賜以疾乞補外遂授薊州刺史無幾召為翰林待制同修國史明年擢尚書禮部侍郎兼翰林直學士世宗崩遺詔移梓宮壽安宮章宗詔百官議皆謂當如遺詔履獨曰非禮也天子七月而葬同軌畢至其可使萬國之臣朝大行於離宮乎遂殯於大安殿二十九年三月進禮部尚書兼翰林直學士賜大

定三年孟崇獻榜下進士及第七月拜參知政事提控
刊修遼史明昌元年進尚書右丞二年六月卒是日履
所生也謚曰文獻履通悟精厯算書繪事初德元以履
為後既而生子震德元歿盡推家貲與之其自禮部兼
直學士為執政乃舉前代光院故事以錢五十萬送學
士院學者榮之

張萬公字良輔東平東阿人幼聰悟喜讀書登正隆二
年進士第調新鄭簿大定四年為東京宸祿鹽副使課

增遷長山令時土寇萬人猝至城下萬公登陴諭以鄉里親舊意衆感悟相率而去邑人賴之為立生祠久之補尚書省令史累遷侍御史尚書右司員外郎俄授郎中敷奏明敏世宗嘉之謂侍臣曰張萬公純直人也遷刑部侍郎章宗即位選為南京路提刑使以治最遷御史中丞會北邊屢有警帝命樞密使爪爾佳清臣發兵擊之萬公言勞民非便詔百官議於尚書省遂罷兵尋為章國軍節度使明昌二年知大興府事拜參知政事

踰年以母老乞就養不許賜告省親還帝問山東河北
粟貴賤及今春苗稼萬公具言雨未霑足且曰陛下即
位以來興利除害無不舉行至於旱災皆由臣等若依
漢典故皆當免官帝曰卿等何罪殆朕所行有不逮者
對曰天道雖遠實與人事相通方今宜崇節儉不急之
務無名之費可俱罷去帝由是以萬公言下詔罪已進
士李邦乂上封事因論世俗侈靡讖涉先朝有司議言
者罪萬公曰讖斥先朝固當治罪然舊無此法今宜定

立使人知之乃命免邦又罪惟殷三舉其奏對詳敏多類此四年復乞侍養特畀鄉郡授知東平府事六年改知河中府時軍興調發叢劇悉為寬假使民力易辦人為繪像於薰風樓又建去思堂移鎮濟南以母憂去職卒哭詔起復拜平章政事躡遷資善大夫封壽國公帝時惑於李淑妃欲立為后大臣多不可帝怒竟進封元妃而邊事方殷連歲旱暵災異數見又多變更制度萬公頗嫌畏不敢強諫須帝有問然後言帝亦弗行也於

是兩上表以衰病勾閒特賜告兩月復起視事初明昌
間沿臨潢達泰州開築壕塹役者三萬人連年未就御
史臺言所開旋為風沙所平無益於禦侮而徒勞民帝
因旱災問萬公所由致萬公對以勞民之久恐傷和氣
宜從御史臺所言罷之為便後丞相襄師還卒為開築
民甚苦之主兵者言比歲征伐軍多敗衄蓋屯田地寡
無以養贍故兵無鬪志願括民田之冒稅者分給之則
士氣自倍朝臣議已定萬公獨上書言其不可者五大

畧以為軍旅之後百姓瘡痍未復不可重擾一也通檢
未久田有定籍括之必不能盡適足以增猾吏之敝長
告訐之風二也浮費侈用不可勝計可推之以養軍三
也兵士失於選擇強弱不別而使同田共食振厲者無
以盡其力疲劣者得以容其姦四也奪民而與軍得軍
心而失天下心其禍有不可勝言者五也必不得已乞
以冒地之已括者召民蒔之以所入贍軍則軍有坐獲
之利而民無被奪之怨矣皆不報萬公嘗言天久陰晦

由人君用人邪正不分君子當在內小人當在外帝問孰謂小人萬公奏張煒田標張嘉貞等雖有才幹無德可稱帝即命三人補外泰和元年遷榮祿大夫賜其子進士及第連章求去皆不允三年加銀青光祿大夫三月歷舉朝臣有名者以自代求去甚力加金紫光祿大夫致仕六年南鄙用兵特起萬公知濟南府山東路安撫使山東連歲旱蝗萬公慮民饑盜起當預備賑濟乃上言乞將僧道度牒師德號觀院名額并鹽引付山東

行部於五州給賣納粟易換又言督責有司禁戢盜賊
之方帝皆從之宋人請和復乞致仕許之加崇進仍給
平章政事俸之半七年卒贈儀同三司諡文貞萬公淳
厚剛正門無雜賓典章文物多所裁正帝嘗有意春蒐
顧視萬公萬公曰動何如靜帝改容而止輔政八年其
所薦引多廉讓之士大安元年配享章宗廟庭

程輝字日新蔚州靈仙人皇統二年擢進士第由尚書
省令史升左司都事久之為南京路轉運使以宮殿火

降授磁州刺史有吳僧者殺州人張善友而取其妻輝督捕之命張母以長錐刺僧與其婦無完膚以死改陝西東路轉運使再遷戶部尚書大定二十三年拜叅知政事輝年雖老遇事敢言畧無隱默世宗嘉之舊廟祭用牛世宗晚年欲易以他牲輝奏曰凡祭用牛者以牲之最重故號太牢古禮不可廢也二十四年世宗幸上京尚書省奏來歲正旦外國朝賀事帝以地遠天寒憫使人勞苦欲即南京受宋書輝奏外國使來必面見天

子今半途受書異時宋人托事效之何以為辭力言不
可於是議權免一年會有司市麵不時酬直世宗怒監
察不舉劾杖責之輝曰監察君之耳目所犯罪輕不贖
而杖亦一時之怒也其敢言類如此二十六年以老致
仕次年復起知河南府事輝辭以衰老而河防責重憂
不勝任於是特詔不預河事章宗立時輝年七十六復
乞致仕許之仍給參政半俸永安元年卒諡忠簡

劉瑋字德玉咸平人唐盧龍節度使仁敬之裔祖弘遼

季鎮懿州國初兵至弘以州降太祖俾知咸州後以同平章政事致仕父君詔同知宣徽院事瑋幼警悟業進士舉熙宗錄其舊特賜及第調安次丞累轉尚書省都事大定初遷戶部員外郎時將東巡命瑋同工部郎中宗中往營行宮就升郎中改同知宣徽院事為使宋國信副使瑋父兄皆以是官使江左當時榮之世宗將幸上京以行在所須皆隸太府欲瑋領其事授戶部侍郎明年擢戶部尚書時河決于衛害被清滄詔瑋兼工部尚

書往塞之或以謂天災流行非人力所能禦惟當徙民以避其衝瑋曰不然天生五材遞相休王今河決者土不勝水也俟秋冬之交水勢稍殺以漸興築庶幾可塞明年春瑋齋戒禱於河功役齊舉河乃復故台還增秩為宋弔祭副使世宗不豫拜參知政事仍領戶部既而為山陵使尋上表請外出知濟南府移鎮河中明昌二年徙知大名府仍領河防事三年入拜尚書右丞帝嘗問考課法今可行否瑋曰考課之法本於綜核名實今

提刑司體察廉能賊濫以行賞罰亦其意也若別議設法恐涉太繁明年六月卒諡安敏璋有才幹臨事閑雅而用心不正然自世宗朝逮輔章宗於事知而不言朝論少之

董師中字紹祖洺州人少敏瞻好學強記擢皇統九年進士第調澤州軍事判官改平遙丞捕殺劇賊王一一境遂安時大軍後野多枯槁驛舍有旅襯悉為葬之遷綿上令補尚書省令史再考擢監察御史遷尚書省都

事初師中為監察時漏察大名總管呼喇不公事及呼喇以罪誅師中坐削一階降授沁南軍節度副使累遷坊州刺史明昌元年選為陝西路提刑副使坐修公廨濫支官錢罪以贖論尋召為大理卿御史中丞吳鼎樞舉以自代尚書省亦奏其才行遂擢中丞時西北路招討使宗肅以平章爪爾佳清臣薦知大興府事師中上言宗肅近以賊罪鞫于有司獄未竟不宜改除帝納其言命復送有司四年帝將幸景明宮師中及侍御史賈

銓治書侍御史鈕祜祿遵古諫言方今邊鄙不馴反側
無定必里克巴噶貪強暴悍深可為慮況都內苑囿近
畿山川足以優佚皇情閱習武事何必草居露宿逼介
邊陲遠煩偵候以冒不測之悔哉帝不納師中等又上
疏曰近年水旱為沴明詔罪已罷不急之役省無名之
費天下欣幸今方春東作而亟遣有司修建行宮揆之
於事似為不急況西北二京臨潢諸路比歲不登加以
民有養馬養軍挑壕之役財力大困流移未復米價甚

貴若扈從至彼又必增價臣恐饑餓之徒將有起而為亂者矣況南北兩屬部數十年捍邊者今為必里克巴噶誘脅傾族隨去邊境蕩搖如此可虞矧夫逸遊古人所戒遠自周秦近逮隋唐與遼皆以是生釁可不慎哉左補闕許安仁右拾遺路鐸亦皆上書論諫是日帝御後閣召師中等賜對即從其奏尋為宋生日國信使還以所得金帛分遺親舊五年帝復如景明宮師中及臺諫官各上疏極諫皆不報擢吏部尚書初監察御史富

拉塔等糾彈完顏守貞數事師中辨其誣而舉守貞正人可用守貞由是復拜平章政事及守貞以罪斥師中左遷陝西西路轉運使歲餘徵為御史大夫命與禮部尚書張暉看讀陳言文字拜參知政事進尚書左丞他

日奏事帝語輔臣曰御史姬端修

按中州集載泰和初元妃李氏方寵幸兄

喜兒有楊國忠之權德州教授田庭方上書言近臣怙寵道陵顧謂紹祖曰近臣怙寵者為誰時喜兒侍立殿

上紹祖倒笏指之曰莫非謂喜兒之屬否上領之本傳祇云姬端修所載互異謹識於此言小人在

側果誰歟師中曰應謂李喜兒輩帝默然承安四年表

乞致仕詔賜宅一區留居京師以寒食乞還家上冢許之泰和二年卒詔依見任宰執例葬祭仍賻贈之諡文定師中工文性通達疏財尚義平居樂易臨事剛決不可奪弟師儉初業進士欲藉其資廕師中保任之密令入代給堂帖使之肄業師儉感激力學校遂登第方在政府以予恩蔭與其姪帝義之以其姪為筆硯承奉

按中

州集載師中師王彥潛而與之同榜登科彥潛沒待其子恩禮殷重不減骨肉正與蔭姪事相類謹附識焉

與胥持國同輔政頗相親附世以此少之

王脩字脩然涿州人皇統二年進士累官刑部員外郎坐請囑故人姦罪杖四十降泰定軍節度副使四遷大

興府治中

中州集作大興府少尹

授戶部侍郎世宗謂宰臣曰王

脩前為外官聞有剛直名今聞專務出罪且非理從輕若果剛直則當忘身以為國履正以無偏何必賣法以徼福耶尋命賑濟密雲等三十六縣明安人戶冒請粟三萬餘石奪官一階出為北京留守同知帝曰人多言王脩能官以朕觀之直一老姦耳章宗即位遷禮部尚

書兼大理卿會葬孝懿皇后父圖克坦貞帝欲用前代故事班劔鼓吹宰臣以貞與祗熙宗誅死難之詔下禮官議脩直言其不可明昌二年改知大興府事時僧徒多游貴戚門脩惡之嚴禁午後不得出寺有一僧犯禁皇姑大長公主為請脩杖殺之京師肅然後坐故出人罪削官特授定海軍節度使乞致仕不許泰和七年卒馬惠迪字吉甫鄴陰人擢天德三年進士第再調昌邑令察廉第一補尚書省令史大定中出為西京留守判

官以治最擢同知崇義軍節度事累遷左司郎中世宗愛其明敏而樸實超授御史中丞拜參知政事時烏達噶叛亡世宗已遣人討之又欲益以甲士毀其船棧惠迪奏曰得其人不可用有其地不可居恐不足勞聖慮明昌元年為南京留守致仕卒

馬琪字德玉大興寶坻人正隆五年擢進士第調清源主簿三遷永清令永清畿縣號難治琪以治聞授同知定武軍節度使事興中府治中召為戶部員外郎改侍

御史主奏高德溫獄於富戶寄錢事皆略不奏世宗以
為寬縱語宰臣曰稱職之才何其難也尋轉左司員外
郎扈從東巡遷右司郎中移左司特遣使宋國還授吏
部侍郎改戶部章宗即位除中都路都轉運使帝命宰
臣選可任戶部者或舉琪帝然之曰琪不肯欺官亦不
肯害民是可用也遂擢為戶部尚書久之削官一階初
琪病告近侍傳旨不具服曳履而出有司議當徒二年
減外猶追官解任大理少卿閻公貞以為琪本遑遽失

措與非病告有違不同宜減徒二年三等論之帝從公

貞議任職如故明昌四年拜參知政事五年

河渠志作二年八月

河決陽武灌封丘而東琪行尚書省事往治之訖役而

還遷中大夫承安元年北邊用兵連歲旱暵表乞致仕

不許明年出鎮武安軍致仕卒子師周閣門祇候琪性

明敏習吏事其治錢穀尤長然性吝好利頗為帝所少

云

尼瑪哈鑑本名威喇隆州人識女真小字及漢字登大

定十三年進士第調隆安教授改即墨主簿召授國子
助教擢近侍局直長世宗器其材改太子侍丞踰年遷
應奉翰林文字兼右三部司正世宗謂宰臣曰鑑嘗近
侍朕知其正直幹治及為東宮侍丞保護太孫禮節言
動猶有國俗純厚舊風朕甚嘉之章宗立累遷戶部侍
郎兼翰林直學士俄轉同知大興府用大臣薦改知大
興府事明昌五年拜參知政事卒諡文肅

黃久約字彌大東平須城人曾祖孝綽有隱德號潛山

先生父勝通判濟州母劉氏尚書右丞長言之妹

按中州集

長言宋相莘老之孫父蹟終儀真令工詩能文有南榮集行世歲在子夢鼠啗明珠寤

而久約生擢進士第調鄆城主簿三遷曹州軍事判官
有盜竊民財訴者以為強郡守欲傳以重辟久約閱實
囚得免死累擢翰林修撰升待制授磁州刺史磁素多
盜既獲而款伏者審錄官或不時至繫者多以杖殺或
死獄中久約惻然曰民雖為盜而不死於法可乎乃盡
謝之而後行久之入為翰林直學士尋授左諫議大夫

兼禮部侍郎為賀宋生日副使道經宿泗見貢新枇杷
子者州縣調民夫遞進還奏罷之時以貧富不均或欲
令富民分貸貧者下有司議久約曰貧富不均亦理之
常若強富民分貸適足以歛怨非損有餘補不足之道
章宗時領右丞相建其議尋遷太常卿仍兼諫職時郡
縣多闕官久約言世宣乏材闕於資格故也明詔每責
大臣守格法而滯人材乞斷自宸衷而力行之世宗從
之即日授刺史者數人久約又言宜令親王以下職官

遞相推舉世宗曰方今縣令最闕宜令刺史以上舉可
為縣令者朕將察其實能而用之又謂久約曰近日察
舉好官皆是諸科監臨全無進士何也豈薦舉之法已
有姦弊不可久行乎久約曰諸科中豈無廉能人但不
因察舉有終身不至縣令者此法未可廢也故事宰相
奏事則近臣退避久約嘗侍朝欲趨出世宗止之自是
諫臣不避以為常章宗即位久約以國富民貧本輕末
重任人太雜吏權太重官鹽價高妨商害民與夫選左

右擇守令八事為獻皆嘉納之再乞致仕不許授橫海軍節度使以優佚之明昌二年致仕卒久約雋朗敢言性友弟為文典贍有外祖之風云

李晏字致美澤州高平人

中州集云唐順宗第十子福王綰之苗裔

性警

敏侗儻尚氣皇統六年登經義進士第調岳陽丞

中州集作

臨汾丞

歷中年令海陵營汴京運木於河晏領之晏以經

三門之險前後失敗者衆乃馳白行臺以其木散投之水使工取於下流人皆便之召補尚書省令史辭去為

衛州防禦判官世宗素識其才名召為應奉翰林文字
時方議郊禮命攝太常博士俄而真授為高麗讀冊官
累遷禮部郎中除西京副留京世宗謂侍臣曰翰林舊
人少新進士類不學至詔赦冊命之文鮮有能者可選
外任有文章士為之左右舉晏於是召為翰林直學士
兼太常少卿以母老乞歸養授鄭州防禦使未赴母卒
起復為翰林直學士世宗嘗問晏縣令闕員取之何道
晏對曰國朝設科取士始分南北兩選北選百人南選

百五十人合詞賦經義入仕之人既多所以縣令未嘗
闕員其後南北通選止設詞賦一科每舉限取六七十
人入仕之人既少縣令闕員蓋由此也帝以為然詔後
取人毋限以數尋擢吏部侍郎兼前職俄為中都路推
排使遷翰林侍講學士兼御史中丞初錦州龍宮寺遼
主撥賜戶民俾輸稅於寺歲久皆以為奴有欲訴者害
之島中晏乃具奏乞盡釋為良世宗納其言於是獲免
者六百餘人故同判大睦親府事默音家有民質券積

息不能償因沒為奴投匭自言事下御史臺晏得其情
奏免之尋為賀宋正旦國信副使及世宗不豫命宿禁
中一時詔冊皆晏為之章宗立晏畫十事以上一曰風
俗奢僭宜定制度二曰禁游手三曰宜停鑄錢四曰免
上戶管庫五曰太平宜興禮樂六曰量輕租稅七曰減
鹽價八曰免監官陪納虧欠九曰有司尚苟且乞申明
經久遠圖十曰禁網差密宜尚寬大又奏乞委待制
懷英修撰張行簡更直進讀陳言文字以廣視聽皆採

納之改禮部尚書兼翰林學士承旨越二年授沁南宮

節度使久之致仕帝念其先朝舊人復起為昭義軍節

度使

按中州集云時澤路旱甚晏擅發倉粟三萬石救
餓者因上章請罪章宗義而釋之史贊所謂君明

臣直者此類是
也謹附識于此

明昌六年歸老得疾永安二年卒諡曰

文簡子仲畧

仲畧字簡之聰敏力學登大定十九年

中州集作
二十二年

詞賦

進士第調代州五臺主簿以母憂去服闋轉韓州軍事

判官累遷太常博士改授左司都事為立夏國王讀冊

官還權令左司未幾轉員外郎以親病求侍特授澤州刺史以便祿養以父喪免起為戶部郎中時帝命六品以上官十日以次轉對乃進言曰凡救其末不若正其本所謂本者厚風俗去冗食養財用而已厚風俗在乎立制度禁奢僭去冗食在乎寵力農抑游惰養財用在乎廣儲蓄時歛散又條陳制度之宜帝嘉納之俄授翰林直學士克經義讀卷官帝問有司言經義不若詞賦罷之如何仲畧奏曰明經所以適用非詞賦比乞自今

以經義進士為考試官庶得碩學之士帝可其奏改吏部郎中遷侍郎兼翼王傳俄兼宛王傳時知大興府事赫舍哩執中坐贓帝命仲畧鞠之罪當削解權要競言太重仲畧奏曰教化之行自近者始京師四方之則也此而不懲何以勵後況執中兇殘狠愎豈可宥之帝曰卿言是也未幾授山東東西路按察使泰和五年卒贈朝列大夫諡襄獻仲畧性豪邁有父風剛介特立不阿權貴臨事明敏無留滯故所任以幹濟稱

李愈字景韓絳之正平人正隆五年中詞賦進士第調河南澠池主簿察廉優等為平陽酒副使累遷解州刺史章宗即位召授同知中都路都轉運使事改同知濟南府明昌二年授曹王傅兼同知定武軍節度使事王奉命宴賜北部愈從行還過京師表言諸部所貢之馬止可委招討司受於界上量給迴賜務省費以廣邊儲擬自臨潢至西夏沿邊創設重鎮十數仍選明安穆昆勲臣子孫有材力者使居其職田給於軍者許募漢人

佃種不必遠輓牛頭粟而兵自富强矣下尚書省議會
愈遷同知西京留守過闕復上言前表可採乞斷自宸
衷帝納用焉自是命五年一宴賜人以為便改棣州防
禦使未幾授大興府治中北京提刑副使范楫知歸德
府事鄧儼各舉愈以自代由是擢河南路提刑使上言
隨路提刑司乞留官一官餘分部巡按又言本司見置
許州乞移治南京為便並從之憲臺廉察九路提刑司
以愈為最五年入見論河決事謂宜遣大臣視護以慰

人心帝是其言明年改河平軍節度使承安二年徙順義軍奏陳屯田利害帝遣使宣諭仍降金牌俾領其事四年召為刑部尚書舊制陳言者漏所言事於人並行科罪仍給告人賞愈言比年以來詔來直言及命朝臣轉對又許外路官言事此皆樂聞忠謹之意請除去舊條以廣言路帝嘉納焉尋為賀宋正旦副使泰和二年春帝將幸長樂川愈切諫曰方今戍卒貧弱三义尤近北陲恒防外患無聞泰和宮在兩山間地形狹隘固不

若北宮池臺之勝帝不從夏四月愈復諫曰北部侵我
舊疆不謀雪恥復欲北幸一旦不警臣恐丞相襄樞密
副使棟摩等不足恃也況皇嗣未立羣心無定豈可遠
事逸游哉帝異其言未幾授河平軍節度使改知河中
府事致仕六年卒諡清獻


王賁字文孺其先自臨潢移宛平曾祖士方正直敢言
遼道宗信樞密使耶律伊蘇之讒殺其太子士方擊義
鍾以訴遼主感悟誅伊蘇厚賞士方授承奉官父中安

擢進士第坐田穀黨事廢世宗即位黨禁解終沂州防禦使賁登進士累擢右三部檢法司正侍御史賈鉉舉賁安靜有守不尚奔競政府亦言其廉擢河北東西大名府路提刑判官選授尚書省都事以喪去用薦起復刑部員外郎累遷南京路按察使卒賁勤敏好學性孝友敦厚尚義不營產業比歿家甚窶帝聞憫惜之贈朝列大夫仍厚卹其家弟質字敬叔登大定二十五年進士第以才幹舉仕至禮部尚書

許安仁字子靜獻州交河人幼孤能自刻苦讀書善屬
文登大定七年進士第調河間縣主簿累遷太常博士
兼國史院編修官章宗為皇太孫安仁以講學被選東
宮轉左補闕應奉翰林文字帝即位改國子監丞徙翰
林修撰同知制誥兼職如故賈鉉路伯達交章稱其立
己純正超授禮部郎中仍兼左補闕朝議以流入實邊
安仁言昔漢有募民實邊之議蓋度地營邑制為田宅
故民輕去故鄉而易於遷徙如使被刑之徒寒餓困苦

靡所顧藉非所宜行帝然之明昌四年春帝將幸景明
宮安仁與同列諫曰金蓮千里之外鄰沙漠隔關嶺萬
一有警何以應變疏奏遂罷幸出為澤州刺史作無隱
論上之凡十篇曰本朝曰情欲曰養心曰田獵曰公道
曰養源曰冗官曰育材曰限田曰理財在郡二年徙同
知河南府事升汾陽軍節度使致仕泰和五年卒諡文
簡安仁質實無華澹然有古君子風故為時人所稱云
溫特赫提克德該習經史以女真字出身累官國史院

編修官大定十五年遷著作佐郎譯解經書十九年改
左贊善以母老求養帝謂其有出倫之材特留之轉翰
林待制卒明昌五年贈翰林學士承旨諡文成子二十
累官左諫議貞祐四年上疏乞緩徵科務從簡易及采
訪忠孝節義湮沒無聞者



欽定續通志卷四百三十四

欽定四庫全書

史部

欽定續通志卷四百三十五至

七

編修_臣謝振定覆勘

總校官原任侍講_臣王燕緒

欽定四庫全書

欽定續通志卷四百三十五

列傳

金十三

梁襄

路伯達

費摩亨

沃呼忠

張大節

張亨

巨構

賀揚庭

焦旭

劉仲洙

李完

馬百祿

欽定四庫全書

欽定續通志

劉璣 琬

康元弼

伊喇益

盧庸

梁襄字公贊絳州人少孤養於叔父寧性穎悟日記千
餘言登大定三年進士第調耀州同官主簿三遷邠州
淳化合有善政察廉升慶陽府推官召為薛王府掾世
宗將幸金蓮川襄上疏極諫曰金蓮川在重山之北自
古極邊之壤也氣候殊異中夏降霜非聖躬將攝之所
凡奉養之具遠勞飛輓其費數倍至於頓舍之處軍騎

聞塞主客不分奪攘蹂躪未易禁止百官衛士穴居露處輿臺阜隸不免因踣此猶細故耳更有大於此者行宮之所非有殿宇城池之固掛甲常坐之馬日暴雨蝕必羸瘠矣禦侮待用之軍冷啖寒眠必疲瘵矣衛宮周廬才容數人一旦霖潦積旬衣甲弓刀霑濕柔脆豈堪為用猶且遠幸松林以從畋獵往來動踰旬月轉輸移徙更倍於前設於行獵之際烈風暴至宿霧漲天以致翠華有峭陵之避襄城之迷百官狼狽於道途衛士衆

錯於隊伍當此宸衷寧無戒悔况所次之宮草畧尤甚
殿宇周垣唯用氍毹布押宿之官驅馳飢渴已不勝倦更
使徹曙巡警露坐不眠精神有限何以克堪燕都地處
雄要北倚山嶮南壓區夏本地所生人馬勇勁又有宮
闕井邑之繁麗倉府武庫之充實非同曩日之陪京也
居庸古北松亭榆林等關東西千里山峻相連近在都
畿易於據守皇天本以限中外開大金萬世之基奈
何越居草萊輕不貲之聖躬愛沙磧之微涼忽祖宗之

大業臣竊惜之臣聞漢唐離宮去長安纔百許里然武帝幸甘泉遂中江充之姦太宗居九成幾致結社之變皆可為殷鑒也今者累歲北幸狃於無虞往而不止臣甚懼焉議者謂遼國之君春水秋山冬夏巴納真得快樂之趣故陛下效之臣愚以謂三代之政今有不可行者況遼之過舉哉且遼基業在山北之臨潢臣知其所遊不過臨潢之旁無重山之隔而契丹之人以逐水草牧畜為業穹廬為居又壤地褊小儀物殊簡輜重不多

然猶隔三五歲方能一行我朝皇業根本在山南之燕
豈可捨燕而之山北乎況輜重浩穰隨駕殆逾百萬以
一身之樂歲使百萬之人困於役傷於財不得其所陞
下其怨之歟議者又謂陛下遠監前世守文之主生長
深宮志氣銷懦筋力拘柔臨難戰懼束手就亡故不憚
遠幸金蓮至於松漠名為坐夏打圍實欲服勞講武臣
愚以為事貴適中不可過當況欲習武不必度關涿易
雄保順薊之境地廣又平獵田以時誰曰不可伏乞陛

下回北轅之車塞雞鳴之路安處中都不復北幸則宗

社無疆之休也世宗納之為罷行襄由是以直聲聞

按中

州集載襄有賀章宗即位表與自河南府倖移華州防
崇使謝表並稱於世本傳佚其文并佚其事附職之

擢禮部主事累遷通遠軍節度副使以喪去服闋授安

國軍節度副使累遷保大軍節度使卒襄長于春秋左

氏傳至於地理氏族無不該貫自蚤達至晚貴膳服常

浚薄云

路伯達字仲顯

中州集作名
仲顯字伯達

冀州人沉厚有識博學能

欽定四庫全書

欽定續通志

四

詩登正隆五年進士第調諸城主簿累除興平軍節度副使入為大理司直大定二十四年世宗將幸上京伯達上書諫曰人君以四海為家豈獨舊邦是思空京師而事遠巡非重慎之道書奏不報閱歲改祕書郎兼太子司經時章宗初嚮學伯達以文行知名選為侍讀以憂去會安軍節度使王克溫舉伯達行義起為西京路轉運同知名為禮部員外郎兼翰林修撰敕與張行簡進讀陳言文字升刑部郎中帝問羣臣曰方今何道使民務本業

廣儲蓄伯達對曰布德流化必自近始請罷畿內採獵之禁廣農田以示敦本輕幣重穀去奢長儉遵月令開籍田以先天下如是而農不勸粟不廣者未之有也是時採捕禁嚴自京畿至真定滄冀北及飛狐數百里內皆為禁地民有盜殺狐兔者有罪故伯達及之累遷刑部侍郎太常卿拜安國軍節度使未幾改鎮安武嘗使宋回獻所得金二百五十兩銀一千兩以助邊未及上而卒其妻傅氏言之帝嘉其誠贈太中大夫仍以金銀

還之傳以伯達嘗修冀州學乃市信都棗強田以贍學
有司具以聞帝賢之賜號成德夫人子鐸鈞鈞字叔和
登大定二十五年進士第終萊州觀察判官鐸最知名
別有傳

費摩亨字仲通本名哈希其先世居遼海祖華善天輔
間移屯東受降城以禦夏人後徙居臨潢亨性敦敏習
儒大定間收充奉職二十八年擢第升為奉御問以上
古為治之道亨奏陛下欲興唐虞之治要在進賢退不

肖信賞罰薄微斂而已章宗即位擢監察御史內侍梁
道兒恃恩驕橫朝士側目亨劾奏其姦遷鎬王府尉出
為定國軍節度副使三遷同知大名府事先是豪猾從
衡亨下車宣明約束闔境帖然承安四年改河南路按
察副使就遷本路副統軍中都西京等路按察使時世
襲家豪奪民田亨檢其實悉還之泰和五年改安武軍
節度使歲大雪民多凍殍亨輸已俸賙贍及勸率僚屬
大姓同出物以濟轉河東南北路按察使卒於官贈嘉

議大夫亨性謹密出入宮禁數年讜議忠言多所裨益
諫豪恣焚之雖家人輩莫知也所歷州郡皆有政績可

紀云

沃呼忠本名蘇布蓋州人習女真契丹字歷兵部樞密
院尚書省令史累遷右三部司正練達邊事嘗奉命使
北致馬四千餘匹詔褒諭之大定二十六年為監察御
史轉尚書省都事章宗立遷兵部員外郎出為滄州刺

史

按金地理志滄州貞元二年來屬置橫海軍節度使
是滄州乃節鎮非刺史州也本傳云刺史與志異

河東路提刑副使圖克坦伊勒呼舉以自代改滕州刺史嘗調發黃河船數以稽期聽贖授北京副留守入為同簽樞密院事兼沂王傳承安二年拜武寧軍節度使致仕泰和三年卒忠信敦慤通法律以直自守不交權貴時譽歸之

張大節字信之代州五臺人擢天德三年進士第調崞縣丞改東京市令世宗判留務甚愛重之海陵修汴京以大節領其役世宗改元遼東或勸赴之大節曰富貴

自有定分何遽爾隨例補尚書省令史累擢左警巡使以杖殺豪民為有司所劾削一階解職未幾授洺州防禦使同知入為太府丞工部員外郎盧溝水嚙安次承詔護視堤成擢修內司使推排東京路戶籍人服其平進工部郎中時阜通監鑄錢法弊與吏部員外郎麻珪莅其事積銅皆竊惡或欲徵民先所給直大節曰此有司受納之過民何與焉以其事聞卒得免徵就改戶部郎中定襄退吏誣縣民匿銅者十八村大節廉得其實

抵吏罪民斲石頌之召授工部侍郎改戶部世宗東巡
徙太府監尋為宋生日使還授橫海軍節度使郡境有
巨盜久不獲大節以方畧擒之後河決於衛橫流而東
滄境有九河故道大節即相宜繕堤水不為害章宗即
位擢中都路轉運使因言河東賦重以他路田賦質之
遂命減焉乞致仕不許徙知太原府近郭有男子被殺
者聞其妻哭聲不哀召而審之果為姦夫所殺人以為
神西山有晉叔虞祠舊以施錢財公使庫大節還其廟

以給營繕徙知大興府治有能名授震武軍節度使部
有銀冶有司以為爭盜由此生議以官權為使大節曰
山澤之利當與民共且貧而無業者雖嚴刑能禁其竊
取乎宜明諭民授地輸課則游手者有所資於官亦便
帝從其議復乞致仕許之仍擢其子刑部員外郎巖叟
為沂州刺史以便祿養承安五年卒大節素廉勤好學
能勵勉後進

按中州集載大節好獎進士類滄州徐臈
太原王澤大興呂造題其指授卒成名士

與本傳相符
附識於此

自以得學於任個待個子加厚又善奕碁

時推第一世宗嘗謂宰臣曰張大節賦性剛直果於從政惜乎用之太晚其見知如此子巖叟字孟弼大定十年進士官至沁南軍中州集作集慶軍節度使大安三年朝廷議塞諸城門以備元兵巖叟曰是任城而不任人不若選兵擇將背城疾戰時議多之

張亨字彥通大興潞陰人登皇統六年進士第調樊山丞以廉幹聞授弘州軍事判官歷鉅鹿宜川令大定二年補尚書省令史除大理司直累遷尚書左司郎中授

戶部侍郎移吏部擢中都路都轉運使坐失劾草場使
鄧汝霖盜草事解職起授戶部尚書時車駕東巡費用
百出自遼以東泉貨甚少計司患其不給欲輦運以支
調度亨謂上京距都四千里若輓錢而行是率三而致
一也不若行會便法使行旅便於囊橐國家無轉輸之
勞而用自足矣俄出為絳陽軍節度使章宗即位以亨
為河東南北路提刑使兼勸農採訪事訪其利病條為
十三事以聞帝嘉納之亨明達吏事在職每存大體畧

苛細御史以寬緩不事事劾之降授蔡州防禦使明年遷南京路轉運使轉知歸德府事致仕泰和二年卒巨構字子成薊州平谷人幼篤學年二十登進士第由信都丞察廉為石城令補尚書省令史授震武軍節度副使改同提舉解鹽司事以課增入為少府監丞再遷知登聞檢院兼都水少監大定二十五年除南京副留守帝謂宰臣曰巨構外淳質而內明悟第乏剛鯁耳若任以長官必有可稱章宗即位擢橫海軍節度使承安

五年致仕卒構性寬厚寡言所治以鎮靜稱性尤恬退
故人既貴不復往來先遺以書則裁答寒溫而已大定
中詔與近臣同經營香山行宮近臣私謂構曰我欲舉
奏公行將大任構辭之以廉慎守法在考功籍始終無
過云

賀揚庭字公叟曹州濟陰人登天德三年經義進士第
調范縣主簿兼尉有治聲大定十三年由安肅令補尚
書省令史授沁南軍節度副使入為監察御史歷侍御

史右司員外郎楊庭性疾惡纖介不少容世宗喜其剛
果俄以廉能遷戶部郎中進官二階頃之授左司郎中
改刑部侍郎山東東路轉運使章宗即位授山東東西
路提刑使明昌二年除洺州防禦使時歲歉民飢楊庭
諭蓄積之家令出所餘以糴之飢者獲濟洺人為之立
石頌德改陝西西路轉運使致仕卒

焦旭字明銳沃州柏鄉人第進士調安喜主簿再轉大
興令攝左警巡事以杖親軍百人長有司議其罪當杖

決世宗曰旭親民吏也若因杖有官人復行杖之何以
行事其令收贖改良鄉令平章政事石琚薦旭幹能可
甄用帝然之召為右警巡使初旭部民有請出賤為良
者旭以無文據付本主道逢監察御史訴其事即收付
旭旭釋之不問為御史所劾削官兩階出為大名府推
官尋授右三部檢法司正以中丞李晏薦代韓天和為
監察御史而改天和獲鹿令章宗初即位太傅克寧右
丞相襄請帝出獵旭劾奏其非帝慰諭之為罷獵明昌

元年登聞鼓院初設官宰執復奏司諫郭安民補闕許
安仁及旭皆堪擢用改侍御史四遷都水監以治河防
勞進官一階授西京路轉運使卒旭性警敏練達時政
與王脩劉仲洙輩並稱能吏

劉仲洙字師魯宛平人大定三年登進士第歷龍門主
簿再調深澤令縣近漳沱河時秋成水忽暴溢仲洙極
力護塞竟無害有盜夜發居民震驚仲洙率縣卒生執
其一餘衆遂潰旦日掩捕皆獲尋以廉能進官一階升

河北西路轉運使度支判官入為刑部主事六遷右司
員外郎俄轉吏部二十九年出為祁州刺史以六善為
教民化之章宗即位除中都西京等路提刑副使先是
田穀等以黨罪廢錮者三十餘家仲洙知其冤上書力
辨帝從之復穀官爵黨禁遂解明昌二年授并王傅兼
同知大同府事尋改平陽移德州防禦使轉運郭邦傑
節度李晏皆舉仲洙以自代升為定海軍節度使歲饑
仲洙表請開倉未報先為賑貸有司劾之罪以贖論時

仲洙兄仲淵以罪責石州仲洙上書請以菜易石朝廷
義而不許久之以年老乞致仕累表方聽泰和八年卒
年七十五仲洙性剛直口語甚訥而長於治民所在皆
有功迹以才行見稱

李完字全道朔州馬邑人經童出身復登詞賦進士第
調澄城主簿有遺愛民為立祠用廉遷定襄令召補尚
書省令史世宗選能吏八人按行天下廉問縣令完其
一也明昌初為監察御史言尚書省令史正隆間用雜

欽定四庫全書

卷四百三十五

十三

流大定初以太師張浩奏請始純取進士天下以為當

今乞以三品官子孫及終場舉人委臺官辟用帝納其

言

按選舉志明昌三年用三品職事官子弟及終場舉人充省通事而罷見役吏人省令史則仍依舊制蓋

納完之言而酌行其意歟

擢尚書省都事出為同知橫海軍節度使

事河間府治中提刑司言完習法律有治劇材升沁州

刺史遷同知廣寧府初遼濱民崔元入城飲不歸求得

尸於水中有司執同飲者訊之皆誣服提刑司疑其寬

以獄界完完廉得其賊乃舟師也遂免同飲人改北京

臨潢路提刑副使承安二年遷陝西西路轉運使尋授
南京路按察使卒完長於吏治所至姦惡屏迹民皆便
之

馬百祿字天錫通州三河人父柔德天會初第進士累
遷翰林修撰坐田穀黨免官迨世宗朝解黨禁復召用
焉百祿幼志學事繼母以孝聞登大定三年詞賦進士
第調武清主簿歷龍山令改權貨副使平陽府判官入
為國子博士朝廷以宰縣日清白有治迹特遷官一階

升同知北京路轉運使委錄南北路刑獄所至無冤名
為戶部員外郎為中都等路推排使明昌初遷耀州刺
史吏民畏愛提刑使以狀聞授韓王傳同知安武軍節
度事改同知興平軍復以提刑司舉廉孟州防禦使再
遷南京路提刑使御史臺以剛直能幹聞轉知河中
府承安四年致仕卒諡貞忠

劉璣字仲璋益都人登天德三年進士第大定初為太
常博士改左拾遺兼許王府文學累除同知漕運司事

嘗奏言漕戶雇直太高虛費官物宜約量裁損若減三之一歲可省官錢一十五萬餘貫帝是其言授戶部員外郎條上便宜數事世宗謂宰臣曰璣言河堤種柳可省每歲隄防之費及言官錢利害甚可取卿等議其可者行之璣向言漕運省費事盡心公家不厚賞無以勸來者乃賜錢三千貫擢濰州刺史徙知濟州未幾遷同知北京留守事坐曲法放免奴婢訴良者左降管州刺史明昌二年入為國子司業轉祭酒尋擢太常卿以昏

耄不任職為御史臺所糾罷承安二年卒兄琬字伯玉
幼名太平以功臣子補閣門祇候遭父喪求終制會海
陵篡立不許改充護衛海陵忌宗室琬坐與往來斥居
鄉里世宗即位琬盡夜兼馳上謁世宗大悅以為護衛
十人長往招宗叙白彥敬赫舍哩志寧皆相繼來附還
報帝喜其有功改御院通進與烏居仁等往南京發遣
六宮百司琬建議留尚書右丞赫舍哩良弼經畧淮右
餘皆北來詔從之丁母憂起復三遷武庫署令車駕幸

西京留疏為中都總管判官累遷太子少詹事兼引進
使尋為陝西統軍都監召為同知宣徽院事遷右宣徽
使與張謹言典領昭德皇后園陵襄事轉左宣徽使以
疾求補外除定海軍節度使以其弟太府監瑋為同知
宣徽院事疏朝辭帝曰朕用卿弟在近密如見卿也賜
賚甚厚卒於官

康元弼字輔之大同雲中人幼敏學善屬文登正隆二
年進士第調汝陽簿累遷同知河北西路轉運使事召

為大理丞大定二十七年河決曹濮間民苦墊溺朝廷遣元弼往相視其地如盎而城在盎中水易為害請於朝徙築於北原曹人賴焉出為弘州刺史閱歲授大理少卿先是衛城為河所壞增築蘇門以寓州治水既退民不樂遷欲復歸衛於是遣元弼按視還言治故城便逐復其舊轉祕書少監兼著作郎改通州刺史兼領漕事章宗立詔充副衛尉再轉大理卿以喪去起復為刑部侍郎兼鄆王傳遷南京路轉運使承安三年致仕卒

伊喇益字子遷本名托摩布中都路呼喇圖明安人以
蔭補國史院書寫積勞調徐州錄事召為樞密院知法
三遷翰林修撰時北邊有警詔百官集議尚書省太尉
克寧銳意用兵益言天時未利宜俟後圖御史臺舉益
剛正可任遂兼監察御史未幾改戶部員外郎明昌三
年畿內饑擢授霸州刺史同授刺史者十一人皆以材
選詔諭之曰親民之職惟在守令比歲民饑卿等往撫
育之益至首出俸粟以食飢者于是倅以下及郡人遞

出粟以佐之且命屬縣視以為法多所全活郡東南有堤久頽圯水屢為害益增修之民以為便為益立祠升遼東路提刑副使五年宋主新立詔以泗州當使客所經守臣宜擇人宰臣進擬數人皆不合帝意帝曰托摩布安在此人可也即授防禦使召為戶部侍郎尋轉兵部屬羣牧人叛益同殿前都點檢究往招降之承安二年邊鄙弗寧召朝官四品以上入議便殿益謂守為便若王師輕出少有不和利非惟損大國之威恐啓敵人侵

玩之心出為山東西路轉運使有敕使按鷹於山東益
奏乞止令調於近甸何必驚遠方耳目書聞帝命有司
治使者罪遷河東南北路按察使舊制在位官有不任
職委所屬上司體訪州府長貳幕職許互相舉申益上
言以為傷禮讓之風亦恐同官因之不睦別生姦弊乞
止令按察司糾劾似為得體又言隨路點軍官與富人
飲會公通獻遺宜依准監臨官於所部內犯罪究治帝
皆納焉泰和二年卒於官

盧庸字子憲薊州豐潤人大定二十八年進士調唐州
軍事判官再調定平縣令治舊堰引涇水溉田民賴其
利累改中都戶籍判官察廉遷禮部主事歷鳳翔治中
大安三年改乾州刺史入為吏部郎中至寧元年改陝
西按察副使夏人犯邊庸繕治平涼城池積芻粟團結
土兵為備十一月夏人掠鎮戎陷涇邠遂圍平涼庸出
府庫賞有功者人樂為死城賴以完貞祐二年詔賞平
涼功庸進官四階遷按察轉運使三年詔諸道按察司

講究防秋庸陳便宜曰自鄜延至積石雖多溝坂無長
河大山為之屏蔽恃弓箭手以禦侮其人皆剛猛善鬪
熟於地利夏人畏之向者徙屯他所夏人即時犯邊此
近年深患也人情樂土且耕且戰緩急將自奮又曰防
秋之際宜先清野又曰掌軍之官不宜臨時易代無何
有言庸老不勝任者即罷之尋改定海軍節度使山東
亂不能赴被劾當奪兩官審理官直之以病致仕興定
三年卒

欽定續通志卷四百三十五

欽定四庫全書

欽定續通志卷四百三十六

列傳

金十四

完顏匡

完顏綱

圖克坦鎰

通吉思忠

穆延薩克達

完顏匡本名蘇色始祖九世孫事幽王永成為其府教讀大定十九年顯宗命詹事烏凌阿愿擇德行淳謹才

學該通者使教章宗兄弟愿舉匡及徐王府教讀布薩額爾克顯宗召見於承華西便殿問其年對曰二十八歲顯宗曰詹事乃云三十歲何也匡曰詹事謂臣出入宮禁故增言之耳顯宗顧謂近臣曰篤實人也命擇日使皇孫行師弟子禮七月丁亥宣宗章宗皆就學顯宗曰每日先教漢字至申時漢字課畢教女真小字習國朝語頃之世宗詔匡額爾克俱充太子侍讀寢殿實達爾圖們玖珠問匡曰伯夷叔齊何如人匡曰孔子稱夷

齊求仁得仁玖珠曰夷齊輕去其親不食周粟餓死首
陽山仁者固如是乎匡曰夷齊全父子兄弟之恩正君
臣之分為天下後世慮至遠也非仁人能若是乎是時
世宗如春水顯宗從二人者馬上相語遂後顯宗問故
玖珠以對顯宗稱善者良久顯宗命匡作睿宗功德歌
教章宗歌之其詞曰我祖睿宗厚有陰德國祚有傳儲
嗣當立滿朝疑懼獨先啓策徂征三秦震驚來附富平
百萬望風奔仆靈恩光被時雨春暘神化周浹春生冬

藏蓋取宗翰與睿宗定策立熙宗及平陝西破張浚於
富平也二十三年三月萬春節顯宗命章宗歌此詞侑
觴世宗大喜顧謂諸王侍臣曰朕念睿宗皇帝功德恐
子孫無由知皇太子能追念作歌以教其子嘉哉盛事
朕之樂豈有量哉卿等亦當誦習以不忘祖宗之功酒
行極歡乙夜乃罷二十五年匡中禮部策論進士是歲
世宗在上京顯宗監國三月甲辰按選舉志御試以三
月二十日試策大定
二十五年正月為乙酉朔則甲辰正三
月二十日也原文作二月誤今改正
御試匡下第布

薩額爾克中四十五人後顯宗謂匡曰但善教金源郡
王無以額爾克登第快快也是歲顯宗薨章宗立為皇
太孫匡仍為太孫侍讀二十八年匡試詩賦漏寫詩題
下注字不取特賜及第除中都路都授侍讀如故章宗
即位除近侍局直長遷翰林直學士使宋令權更名弼
以避宋祖諱遷秘書監累遷簽書樞密院事承安元年
行院於撫州河北西路轉運使

章宗紀作尚書戶部侍郎

溫昉行六

部事主軍中餽餉屈意事匡以馬幣為獻及私以官錢

佐匡晏會費監察御史姬端修劾之時方委匡以邊事

遂寢其奏尋入守尚書左丞

章宗紀作右丞

兼修國史進世宗

實錄章宗立提刑司專糾察黜陟當時號為外台匡與

司空襄參政揆奏息民不如省官聖朝舊無提刑司皇

統大定間數歲一遣使廉察郡縣稱治自立此官冀達

下情乃是非混淆徒煩聖聽乞自今提刑司不使兼採

訪廉能之任而歲遣監察體察仍不時遣使廉訪帝從

其議於是監察體訪之使出矣初匡行院於撫州章格

將攻邊境會西南路通事洪果安春使烏都溫部知其
謀奔告行院匡為之備迎擊章格敗之安春與八品職
遷四官匡遷三官匡奏乞以所遷三官讓其兄奉御賽
音許之改樞密副使授世襲穆昆宋韓侂冑嘗再為國
使窺知朝廷虛實與蘇師旦倡議復讎泰和五年使邊
將寇確山鄧州境以嘗試朝廷遂平縣獲宋人王俊唐
州獲宋謀者李忤備言侂冑謂大國西北用兵連年公
私困竭可以得志江州鄂岳屯兵期以五月大入河南

統軍司奏請益兵為備乃詔布薩揆宣撫河南遺書宋人宋人辭曰盜賊也邊臣不謹今黜之矣朝論皆言江南敗衄之餘不敢渝盟匡曰彼置忠義保捷軍取先世開寶天禧紀元豈望中國者哉及河南統軍使赫舍哩子仁使宋還奏宋主修敬有加無他志帝問匡匡徐對曰子仁守疆圉不妄生事職也書曰有備無患在陛下

宸斷耳於是罷河南宣撫司布薩揆還朝六年

按宋史是年四

月陳孝慶復泗州五月復虹縣原文俱繫之二月令刪正宋人陷散關取泗州虹縣

靈壁四月復詔布薩揆行省事於汴制諸軍頃之以匡
為右副元帥匡奏布薩揆大軍渡淮宋人聚兵襄河以
窺唐鄧汴京留兵頗少有掣肘之患請出唐鄧從之遣
前鋒都統烏庫哩慶壽以騎八千攻棗陽遣左翼提控
完顏江山以騎五千取光化右翼都統烏克遜尼敦取
神馬坡皆克之匡軍次白虎粒都統完顏諳達取隨州
烏庫哩慶壽扼赤岸斷襄漢路宋隨州將雷太尉遁去
遂克隨州於是宋鄧城樊城戍兵皆潰賜詔獎諭戒諸

軍毋虜掠焚壞城邑匡進兵圍德安分遣諸將徇下安
陸應城雲夢漢川荆山宜城等縣十二月敗宋兵二萬
人於信陽州之東詔匡以右副元帥權尚書右丞行省
事先取襄陽以屏蔽蜀漢布薩揆得疾還詔右丞相宗
浩代之七年九月宗浩薨匡為平章政事兼左副元帥
封定國公代宗浩總諸軍行省於汴京初布薩揆至汴
購得韓侂冑族人元靚使行間於宋元靚渡淮宋督視
江淮兵馬事丘富奏之宋主時宋主見兵屢敗以為憂

得宗奏命遣人護元親北歸因請議和宗使其屬劉祐
送元親申和議於揆揆曰稱臣割地獻首禍之臣然後
可及宗浩代揆方信孺至宗浩以信孺輕佻當遣忠實
人詣軍前議於是左司郎中王柟至汴以宋主及侂冑
情實為請依靖康二年正月請和故事世為伯姪國增
歲幣為三十萬兩匹犒軍錢三百萬貫蘇師旦等俟和
議定當函首以獻以侂冑書上元帥府匡察其不妄乃
具奏章宗詔匡移書宋人當函侂冑首贖淮南地改犒

軍錢為銀三百萬兩時宋吏部侍郎史彌遠用事定計殺侂冑和好自此成矣廷議諸軍已取關隘不可與王柟再以宋叅政錢象祖書來請歸川陝關隘所畫銀兩悉力祇備韓侂冑首必當函送遵上國之命匡奏聞詔報曰侂冑渠魁既請函首宋之悔服可謂誠矣匡乃遣王柟還而復書許還陝西關隘王柟之歸也匡要以先送叛亡驅掠然後割賜淮南川陝及彼誓書草本有犯廟諱字及文義有不如體製者諭令改之宋人以叛亡

驅掠散在州縣一旦拘刷未易聚集歲幣犒軍物多非旬月可辦錢象祖復以書來匡即具奏詔報曰侂冑師旦首函及諸叛亡至濠州即聽通謝人使入界軍馬即當撤還川陝關隘候歲幣犒軍銀兩至下蔡晝日割賜匡得詔即諭宋人使如詔書從事八年四月乙未宋獻韓侂冑蘇師旦首函至元帥府匡遣平南撫軍上將軍赫舍哩貞露布以聞五月丁未御應天門受宋馘獻之廟社以露布頒中外竿侂冑師旦首并二人畫像於通

衝百姓縱觀然後漆其首藏之軍器庫丙辰匡朝京師
進官兩階罷元帥府仍為樞密院十一月丙辰章宗崩
匡與元妃李氏俱受遺詔立衛紹王匡欲專定策功遂
構殺李氏大安元年四月拜尚書令封申王十二月薨
匡自章宗幼年侍講讀最親幸致位將相怙寵自用官
以賄成承安中撥賜家口地土匡乃自占濟南真定代
州上腴田輒奪民業及限外自取嘗受人玉吐鶻然後
與官公論鄙之

完顏綱字正甫明昌中為奉御累官左拾遺遷刑部員外郎綱言諸犯死罪除名移推官司相去二百里并犯徒罪連逮二十人以上者並令就問如上京路移推臨潢路北京留守司移推西北路招討司動經數月愈致稽留乞依舊制令移推官司追取其人歸問從之泰和元年為賜夏主生日使轉工部郎中上言太府監官兼尚食局官乞於少府監注能幹官一員兼儀鸞局儀鸞局官一員兼少府監相須檢治從之四年詔綱與喬宇

宋元吉編類陳言文字綱等奏凡闕涉官庭及大臣者
摘進其餘以省台六部各為一類凡二十卷遷同簽宣
徽院事六年與宋連兵陝西諸將頗相異同以綱為蜀
漢路安撫使都大提舉兵馬事與元帥府叅決西事調
羌兵之未附者呼里族帥曰埒爾錦吐蕃之種也據古
疊州有四十三族十四城三十餘萬戶東鄰宕昌北接
臨洮積石西行四十日至河外南行十日至笋竹大山
蓋蠻境也埒爾錦卒子額爾袞嗣宋不能制縻以官爵

傳六世至青伊克尤勁勇得衆曹佛哩為洮州刺史有智畧能結諸羌青伊克畏慕佛哩請舉國內附朝廷以與宋盟不許明昌間屬羌伊伯殺郡佐反時綱為奉御奉詔與曹佛哩計事因召青伊克會兵擊破伊伯佛哩遷同知臨洮尹兼洮州刺史子普賢為洮州管內巡檢使綱屢以事至洮佛哩每言青伊克願歸朝出其至情綱輒奏之帝終不納及綱部署陝西帝密敕經畧西事時佛哩已死綱至洮馳召普賢傳箭入羌中青伊克大

喜率諸部長藉其境土人民詣綱請內屬綱奏其事帝以青伊克為疊州副都總管加廣威將軍曹普賢真授同知洮州事綱遷拱衛直都指揮使進三階宋程松襲據和尚原富察貞遣將擊破之連敗宋兵盡復故地十月綱與富察貞舒穆魯仲溫完顏璘分道出師宋將吳曦時為昭武軍節度使成都潼川夔利等路宣撫副使遣兵出秦隴間與綱等諸軍相拒帝聞韓侂胄忌曦威名可以間誘致之梁益居宋上游可得志於宋封曦蜀

國王鑄印賜詔詔綱經畧之綱次臨江進至水洛訪得
曦族人端署為水洛城巡檢使遣持詔間行諭曦曦得

詔意動以程松尚在興元未敢發及松兵敗曦乃遣掌

管機宜文字姚圖

宋史作姚淮源

與端奉表送款綱遣前京兆

府錄事張仔

原文遺仔字

會吳曦於興州之口

原文作置口誤曦

盡出告身付張仔以報仍獻階州

按續通鑑開禧二年四月吳曦遣其客獻

階成和鳳四州於金求封蜀王十一月完顏綱以金主命遣人持詔書金印立曦為蜀王與宋紀所載相符是志乎叛者曦也本傳序金人之績故先言賜詔封曦而以曦之叛及獻階州事次於後云尋遣使奉

表獻蜀地圖志及吳氏譜牒七年正月召綱赴京師以
為陝西宣撫副使進三階還軍頃之宋安丙殺吳曦帝
聞之遣使責綱詔以端之子為曦後宋人復陷階州及
西和州綱至鳳翔詔撤五州之兵退保要害其願徙內
地者厚撫集之富察貞撤黃牛戍宋安丙乘之遂陷散
關鞏州鈐轄完顏愛實死之綱奪官一階降兵部侍郎
權宣撫副使遣尼瑪哈懷忠按治綱以下將吏未至綱
與貞遣兵潛自昆谷西山養馬澗入四面攻之復取散

關斬宋將張統領遣使奏捷詔書獎諭貞等釋不問八年宋獻韓侂冑蘇師旦首詔以陝西關隘還之宋罷兵網還京師衛紹王即位除陝西路按察使累官尚書左丞至寧元年網行省事於縉山圖克坦鎰使人謂網曰高琪駐兵縉山甚得人心士皆思奮與其行省親往不若益琪兵為便網不聽圖克坦鎰復使人止之曰高琪措畫已定彼之功即行省之功網不從至縉山兵大敗呼沙呼斬闖入中都遷衛紹王於衛邸命網子安和作

家書使親信人召綱綱至押至市口使張霖卿數以失
四川敗縉山之事殺之貞祐四年安和權復州刺史上
書訟父冤乃追復尚書左丞弟鼎努亦知名仕至叅知
政事

圖克坦鑑本名安春上京路蘇蘇保子明安人父烏尼
音北京副留守鑑穎悟絕倫甫七歲習女真字大定六
年選諸路學生三十餘人令編修官溫特赫提克德教
以古書習作詩策鑑在選中遂通契丹大小字及漢字

該習經史九年八月詔策女真進士問以求賢為治之道
道鑑等二十七人及第鑑授兩官餘授一官上三人為
中都路教授四名以下除各路教授十五年鑑自中都
路教授選為國子助教左丞相赫舍哩良弼嘗到學中
與鑑談論深加禮敬尋除國史院編修官太尉完顏守
道薦鑑有材力可任政事帝亦以鑑容止溫雅其心平
易久之兼修起居注累遷翰林待制兼右司員外郎章
宗即位遷左諫議大夫兼吏部侍郎明昌元年為御史

中丞無何拜參知政事兼修國史章宗銳意於治平鑑
上書其畧曰臣竊觀唐虞之書臣之進言於君曰戒哉
懋哉曰吁曰都既陳其戒復導其美君之為治也必曰
稽於衆舍已從人既能聽之又能行之陛下誠宜稽古
宗德留意於此又云唐陸贄嘗陳隔塞之九弊上有其
六下有其三陛下能慎其六為臣子者慎其三則大綱
舉而羣目張矣進尚書右丞修史如故三年罷為橫海
軍節度使改定武軍節度使知平陽府事歷西京上京

留守承安五年拜平章政事封濟國公淑妃李氏擅寵
兄弟恣橫朝臣往往出入其門是時烈風昏曠連日詔
問變異之由鎰上疏畧曰今五帝不立五德不興縉紳
學古之士棄禮義忘廉恥細民違道畔義迷不知返非
一朝一夕之故也今宜正風俗順人心父子夫婦各得
其道然後和氣普洽福祿薦臻矣因論為政之術一宜
正臣下之心二宜導學者之志其言皆切時弊帝納其
說而不能行一日帝問漢高帝光武優劣鎰曰光武再

造漢業在位三十年無沉湎冒色之事高祖惑戚姬卒
至於亂由是言之光武優帝默然鎰蓋以元妃李氏隆
寵過盛故微諫云泰和四年罷知咸平府五年改南京
留守六年徙知河中府兼陝西安撫使布薩揆行省河
南陝西元帥府雖受揆節制實頗方面帝思用謀臣制
之由是升宣撫使一品鎰改知京兆府事充宣撫使陝
西元帥府並受節制鎰言初置急遞舖本為轉送文牒
令一切乘馬非便帝深然之始置提控急遞舖官郵達

自此無滯七年吳曦死宋安丙分兵出秦隴間十月詔
鑑出兵金房以分掣宋人梁益漢沔兵勢鑑遣行軍都
統沃呼雅爾副統巴噶罕完顏果囉以步騎五千出商
州十一月雅爾拔鶻嶺關果囉別將攻破燕子關新道
口巴噶罕取小湖關教倉至營口鎮破宋兵千餘人追
至上津縣斬首八百餘級遂取上津縣雅爾破宋兵二
千於平溪將趨金州宋王柵以書乞和詔鑑召雅爾軍
退守鶻嶺關八年正月宋安丙遣景統領由梅子溪新

道口朱砂谷襲鵲嶺關巴噶罕果囉擊走之斬景統領
於陣是歲罷兵鑑遷特進賜資有差改知真定府事大
安初加儀同三司封濮國公改東京留守尋克遼東安
撫副使三年改上京留守平章政事通吉思忠敗績於
會河堡中都戒嚴鑑曰事急矣乃選兵二萬遣同知烏
克遜鄂屯將之入衛中都朝廷嘉之徵拜尚書右丞相
監修國史鑑言自用兵以來彼聚而行我散而守以聚
攻散其敗必然不若入保大城併力備禦昌桓撫三州

素號殷富人皆勇健可以內徙益我兵勢人畜貨財不

至亡失平章政事伊喇

按本史國語解伊喇曰劉考衛紹王時亦無伊喇姓為平章政

事者此處恐有脫誤

參知政事梁瑄曰如此是自覺境土也衛紹

王以責鑑鑑復奏曰遼東國家根本距中都數千里萬

一受兵州府顧望必須報可誤事多矣可遣大臣行省

以鎮之衛紹王不從其後失昌桓撫三州乃大悔頃之

東京不守衛紹王自訟曰我見丞相恥哉頃之鑑墮馬

傷足在告聞呼沙呼難作命駕將入省遇兵士索人於

間巷鑑乃還第呼沙呼詣鑑問疾鑑從容謂之曰翼王
章宗之兄顯宗長子衆望所屬元帥決策立之萬世之
功也呼沙呼默然而去乃迎宣宗於彰德呼沙呼既殺
圖克坦南平欲執其弟知真定府事銘鑑說之曰車駕
道出真定鎬王家在威州河北人心易搖圖克坦銘有
變朝廷危矣不如與之金牌奉迎車駕銘必感元帥之
恩呼沙呼從之至寧貞祐之際轉敗為功惟鑑是賴

馬 謹按通鑑輯覽

御批

云圖克坦鑑身為丞相過國家大變既不能討賊又不
能盡節徒以定計策立委蛇自免豈得為忠臣哉史以轉

敗為功與
之謬矣

宣宗即位進拜左丞相封廣平郡王授中都

路德勒圖世襲明安富爾錦必喇穆昆明年鑑建議和
親言事者請罷按察司鑑曰今郡縣多殘毀正須按察
司撫集不可罷遂止宣宗將章南京鑑曰鑾輅一動北
路皆不守矣今已講和聚兵積粟固守京師策之上也
南京四面受兵遼東根本之地依山負海其險足恃備
禦一面以為後圖策之次也不從是歲薨詔賻贈從優

鑑博學明敏一時名士皆出其門嘗歎文士委頓當以仁義道德為本乃著學之急道之要二篇太學諸生刻之石有弘道集六卷

通吉思忠本名遷嘉努明昌六年為行省都事累遷同簽樞密院事承安三年除興平軍節度使改西北路招討使初大定間修築西北屯戍西自塔木色東至呼爾根幾六百里工役促迫雖有墻隍無女墻副提思忠增繕計工七十五萬止用戍軍役不及民帝嘉其勞優詔

獎賜入為簽樞密院事轉吏部尚書拜參知政事泰和

五年宋將渝盟左丞相崇浩

按宗端修傳章宗因避睿宗諱凡太祖諸子皆加山

為崇改宗氏為姬氏考宗浩本傳仍稱原名此稱崇浩從改名也

曰宋久敗之國必不

敢動思忠曰宋雖羈栖江表未嘗一日忘中國但力不

足耳後果如思忠策六年四月上議伐宋大臣猶言無

足慮者思忠堅執前議帝深然之七年正月元帥左監

軍赫舍哩執中圍楚州久不能下宰臣奏請命大臣節

制其軍及益兵攻之思忠請行乃用唐宰相宣慰諸軍

故事以思忠克淮南宣慰使持空名宣敕賞立功者詔百官集議於廣仁殿既而宋人請和議遂寢頃之進拜尚書右丞大安初拜平章政事三年與參知政事承裕將兵屯邊方繕完烏沙堡思忠等不設備元兵奄至取烏雲營思忠不能守坐解職

穆延薩克達臨潢路人其先以功授世襲穆昆薩克達幼襲爵守邊有勞泰和六年南鄙用兵授蔡州防禦使同知五月宋將李爽圍壽州田俊邁陷蘄縣布薩揆遣

安國軍節度副使納喇邦烈與薩克達以精騎三千戍
宿州俊邁率步騎二萬來襲邦烈薩克達逆擊大破之
郭倬李汝翼以衆五萬繼至攻城甚力城中叢射敵不
能逼會淫雨潦溢敵露處勞倦邦烈潛遣騎二百突出
敵後敵亂薩克達率騎擊之殺傷數千人敵復聞援軍
將至遂夜遁邦烈薩克達復追擊大破之獲田俊邁十
月揆以行省兵三萬出賴壽薩克達為驍騎將中軍副
統克安豐軍戰霍丘花壓功居多十二月從攻和州

按宋

史寧宗紀開禧二年十一月金人破和州中流矢卒薩
及安豐軍十二月金人去和州紀月互異
克達形不過中人而拳勇善鬪所用槍長二丈又工用
手箭箭長不盈握散置鎧中以百數遇敵抽箭以鞭揮
之或以指鉗取飛擲數矢齊發無不中敵以為神其箭
皆以智創雖子弟不能傳其法在北部守厭山營敵畏
不敢近及死將士皆惋惜之

欽定續通志卷四百三十六